

Meeqqanut tapiissutit pillugit Inatsisartut inatsisaat pillugu Namminersorlutik Oqartussat inatsimmik nalunaarutaat

Matumuuna meeqqanut tapiissutit pillugit Inatsisartut inatsisaat nr. 9, 7. december 2009-meersoq, Inatsisartut inatsisaanni nr. 7, 27. november 2018-meersumi allannguutit ilanngullugit, nalunaarutigineqarpoq.

Kapitali 1

Aalajangiineq naatsorsuinerlu

§ 1. Inatsit manna tunngavigalugu meeqqanut tapiissutisisinnaatitaanermi makku piumasaqaataapput:

- 1) meeraq 18-it inorlugit ukioqassasoq,
- 2) meeraq Kalaallit Nunaanni kommunimi innuttaaffeqartuussasoq aamma meeqqanut tapiissutiniq tiguisinnaatitaasoq Kalaallit Nunaanni aalajangersimasumik najugaqartuullunilu inuit aqqisa allattorsimaffianni nalunaarsorneqarsimassasoq,
- 3) meeraq meeqqanulluunniit tapiissutiniq tiguisinnaatitaasoq qallunaatut innuttaassuseqassasoq, imaluunniit meeraq meeqqanulluunniit tapiissutiniq tiguisinnaatitaasoq ukiumi kingullermi Kalaallit Nunaanni najugaqarsimassasoq,
- 4) Meeqqanik inuusuttunillu ikiorsiisarneq pillugu Inatsisartut peqqussutaat imaluunniit Meeqqat tapersorneqarnissaannut Inatsisartut inatsisaat naapertorlugit meeraq angerlarsimaffiup avataanut pisortanit inissinneqarsimassanngilaq allatigulluunniit pisortanit pilersorneqarluni aamma
- 5) meeraq katissimassanngitsoq.

Imm. 2. Inunnut Nunat Avannarliit Isumaqatigiissutaat social sikring pillugu imaluunniit nunat tamalaat isumaqatigiissutaat allat naapertorlugit isumannaallisaatitut ikiorsiissutiniq tiguisinnaatitaasunut meeqqap Kalaallit Nunaanni kommunimi innuttaaffeqartuunissaanik piumasaqaat atuutinngilaq.

§ 2. Meeqqanut tapiissutit meeqqap pilersorneqarnissaanut tunniunneqartarput, meeqqamillu pineqartussaallutik.

Imm. 2. Meeqqanut tapiissutit inummut tapiissutiniq pisinnaatitaasumut tunniunneqarnissaannik akiligassaqarfigisamit malersorneqaataassanngitsoq, utertitsilluni akiliuteqartitsisoqarsinnaanani il.il.

Imm. 3. Meeqqanut tapiissuteqartarnermi ukioq qaammatisiuteqarfusoq malinneqassaaq.

§ 3. Meeqqanut tapiissutit procenti aaqiissutissaq aamma maannakkorpiaq aningaasat pillugit Inatsisartut inatsisaanni § 5 naapertorlugu isertitat aallaavigalugit naatsorsorneqartarput.

Imm. 2 Angajoqqaat najugaqatigiippata, meeqqamut tapiissutit angajoqqaat katillutik isertitaat akileraaruteqaataasussat aallaavigalugit tunniunneqassapput.

Imm. 3. Meeraq angajoqqaami arlaanni najugaqarpat, meeqqanut tapiissutit naatsorsorneqassapput taassuma isertitai akileraaruteqaataasussat aallaavigalugit. Angajoqqaat taanna katissimappat imaluunniit aalajangersimasumik inooqateqarpat aappaasup isertitai akileraaruteqaataasussat imaluunniit inooqataasup isertitai akileraaruteqaataasussat naatsorsuutigineqassapput, inooqatigiinneq sivikinnerpaamik ukiumik ataatsimik atasimappat.

Imm. 4. Meeraq assigiimmik angajoqqaami arlaanni najugaqarpat, angajoqqaamut meeqqap inuit allattorsimaffianut nalunaarutigineqarami najugaqarfigisaanut, isertitai akileraarutaasussat aallaavigalugit naatsorsorneqassapput.

Imm. 5. Maannakkorpiaq aningaasarsiat naatsorsuinermit tunngaviusut malunnaatilimmik allannguuteqarpata imaluunniit meeqqat amerlassusaat allanngorpat, allannguutit naapertorlugit meeqqanut tapiissutit naatsorsorneqassapput. Maannakkorpiaq aningaasarsiat malunnaatilimmik allanngorsimatillugit, procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni § 6-imil malittarisassat naapertorlugit maannakkorpiaq aningaasarsiat naatsorsorneqassapput.

Imm. 6. Ilaqutariit Kalaallit Nunaannut nuuttut, § 1-imil piumasaqaatit naammassisimappatigit, nuunnermik kingorna qaammatip aallaqqaataaniit meeqqanut tapiissutit tunineqarsinnaapput. Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni § 6 naapertorlugu meeqqanut tapiissutit, maannakkorpiaq aningaasarsiasat naatsorsuutigit aallaavigalugit naatsorsorneqassapput.

§ 4. Ukiumoortumik meeqqamut ataatsimut tapiissutit qaffasinnerpaaffissaasa annertussusaat tassaapput 8.477 kr.-it.

Imm. 2. Meeqqanut tapiissutit aningaasarsiat annertusiartornerat ilutigalugu annikillilernerneqassapput. Maannakkorpiaq aningaasarsiat 130.000 kr.-it anguppatigit meeqqanut tapiissutit annikillilernerneqassapput. Aningaasanut killigititaq taanna meeqqap siulliup saniatigit meeqqanut, meeqqamut ataatsimut 25.000 kr.-inik qaffanneqassaaq.

Imm. 3. Annikilliertortitsineq pissaaq annikilliertortitsinermut procentit nikerartut atorlugit. Meeqqamut ataatsimut, naatsorsuinermit tunngavigineqartumut, annikilliertortitsinermut procenti 3,5 pct.-iuvoq.

Imm. 4. Meeqqanut tapiissutit ima naatsorsorneqassapput aningaasarsiatut tunngavik annikilliertortitsinermi procentimik atorineqartumik amerlisariarlugu meeqqanut tapiissutit annerpaanit ilanngaatineqassalluni. *Imm. 2* naapertorlugu aningaasarsiat tunngaviusut tassaapput maannakkorpiaq aningaasarsiat, aningaasarsiat apeqquaatillugit ilanngaattissanik ilanngarlugit.

Imm. 5. Meeqqanut tapiissutit imaluunniit aningaasarsiat tunngaviusut negativiusinnaangillat.

Imm. 6. Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni § 3 naapertorlugu imm. 1-imil aamma imm. 2-mil aningaasat ukiumi naatsorsuiffimmi pineqartumi procenti aaqqiissutissaq malillugu ukiut tamaasa aaqqivigineqartassapput.

Kapitali 2

Meeqqanut tapiissutit tunniunneqartarnerat

§ 5. Angajoqqaat najugaqatigiippata, meerarlu taakkunani najugaqarpat, meeqqamut tapiissutit meeqqap arnaanut tunniunneqartassapput, tapiissutit ataataasumut tunniunneqarnissaat isumaqatigiissutigineqarsimatinngu.

Imm. 2. Meeraq angajoqqaat arlaat najugaqarfigippagu meeqqanut tapiissutit tassunga tunniunneqassapput. Meeraq angajoqqaamini tamani assigiimmik najugaqartarpat, inuit aqqisa allattorsimaffianni meeqqap najugaqarfiatut nalunaarsorneqarsimasumut tunniunneqartassapput.

Imm. 3. Meeraq nammineq aaqqissuussamik ilaqutariinnut inissinneqarsimappat, angajoqqaarsianut tunniussisoqartarnissaanik kommuni aalajangiisinnaavoq.

Imm. 4. Meeraq atuarfimmi najugaqarfiutigisumiippat, efterskolemi taassumaluunniit assigisaani najugaqarpat kommuni aalajangiisinnaavoq meeqqanut tapiissutit tamakkiisumik tamakkiisuunngitsumilluunniit meeqqamut tunniunneqartassasut.

§ 6. Meeqqanut tapiissutit siumut qaammatikkaartumik tunniunneqartassapput.

Imm. 2. Meeqqanut tapiissutit tunniunneqarsinnaanissaannut piumasaqaatit, qaammatip pineqartup ulluani siullermi, eqqortinneqarsimassapput.

Imm. 3. Meeqqanut tapiissutit siullermeerlugit tunniunneqartassapput qaammammi qaammatip tapiissutininik pisinnaatitaalernerup tullianit. Kingullermik tunniussineq pisassaaq qaammammi tapiissutininik pisinnaatitaanerup atorunnaarfiani.

Imm. 4. Meeqqap soqutigisaasa pisariaqartitaasalu tamanna pisariaqalersippassuk kommunalbestyrelsi aalajangiisinnaavoq meeqqanut tapiissutit tamakkiisumik ilaannakortumilluunniit nioqqutissanik pisissutissanngorlugit tunniunneqartassasut, imaluunniit kommunalbestyrelsip aalajangersagai malillugit aqunneqassasut.

Imm. 5. Meeqqanut tapiissutit tunniunneqartarnerannut malittarisassanik Naalakkersuisut aalajangersaasinnaapput, tassunga ilanngullugit ukiukinnerusunut tapiissutininik tunniussisarnermi aqutsinermilu malittarisassanik aalajangersaaneq kiisalu tunniussinermi annikinnerpaaffiliinissamut aalajangersaaneq.

Kapitali 3

Aqutsineq, aningaasalersuineq, naammagittaalliuuteqarsinnaaneq il. il.

§ 7. Meeqqanut tapiissutininik tunniussisoqarnissaa kommunip innuttaaffigisap pisussaaffigaa.

Qinnuteqartoqaqqaarnani, tunniussisoqartarnissaa kommunalbestyrelsip sulissutigissavaa. Meeqqanut tapiissutit angissusissaasa naatsorsorneranut paasissutissat pisariaqartut pissarsiarineqarnissaat kommunalbestyrelsip pisussaaffigaa.

Imm. 2. Inatsisartut inatsisaat naapertorlugu pisinnaatitaasoq kommunimut allamut nuuppat, kommuni nuuffiusoq paasissutissanik pisariaqartunik kommunimut qimanneqartumut qinnuteqassaaq. Kommuni nuuffiusup kommunillu qimanneqartup akornanni paasissutissat qarasaasiatigut pissarsiarineqarsinnaapput.

§ 8. Meeqqanut tapiissutininik kukkunikkut tunniussisoqanngitsoorsimasooq kommunalbestyrelsip paasippagu ilisimatinneqaruniluunniit, kukkuneq tapiissutininik pisinnaatitaasumiinngippat, meeqqanut

tapiissutininik tunniussisoqarnissaanik pisinnaatitaalerfup aallartinneraniit tunniussisoqassaaq.

Imm. 2. Piumasaqarsinnaaneq pisoqalissaaq pisoqalisut pillugit malittarisassat nalinginnaasut malillugit.

§ 9. Meeqqanut tapiissutininik tiguisartup pisussaaffigaa kommunalbestyrelsimut pissutsinik meeqqanut tapiissutininik naatsorsuisarnermut tunniussisarnermullu pingaaruteqartunik, kiisalu pissutsit taakku allannguuteqarnerininik tapiissutit ikilineqarnissaannut tunniunneqartarunnaarnissaannulluunniit tunngavittut pingaaruteqartunik nalunaaruteqassalluni.

Imm. 2. Meeqqanut tapiissutininik tunniussinissamut tunngavigineqartussanik isertitat akileraaruteqaataasussat pillugit paasissutissanik kommunalbestyrelsi pissarsiniarsinnaavoq.

Imm. 3. Meeqqanut tapiissutininik nalunngereeraluarlugu tigussassinngisaminik tamakkiisumik ilaannakortumilluunniit tigusaqartup tigussassinngisani kommunimut ingerlaannaq utertissavai, aningaasallu taakku utertinneqartut landskarsimut utertinneqassallutik.

§ 10. Meeqqanut tapiissutininik aningaasartuutit landskarsimit akilernerqartassapput.

Imm. 2. Utertitsilluni akiliisarneq, naatsorsuutininik saqqummiussisarneq, kukkunersuiisarneq aamma nakkutilliisarneq pillugit malittarisassanik Naalakkersuisut aalajangersaasinnaapput.

§ 11. Inatsit manna tunngavigalugu aalajangiinerit isumaginnittoqarfup aquunneqarnera aaqquissuunneqarneralu pillugit Inatsisartut peqqussutaat malillugu naammagittaalliutigineqarsinnaapput.

Kapitali 4

Atortuulersitsineq

§ 12. Inatsisartut inatsisaat manna 1. marts 2010-mi atortuulerpoq.

Imm. 2. Peqatigisaanik meeqqanut tapiissutit pillugit inatsisartut peqqussutaat nr. 11, 31. oktober 1996-imeersoq atorunnarsinneqarpoq.

Meeqqanut tapiissutit pillugit Inatsisartut inatsisaata allanngortinnera pillugu Inatsisartut inatsisaat nr. 7, 27. novemberi 2018-meersoq.

(Naatsorsuinerimut periaaseq nutaaq, aningaasarsiat akileraarutaasussat maannakkorpiaq aningaasarsianit taarserneqarput aamma procenti aaqquissutissaaq atorlugu meeqqanut tapiissutit aaqquigineqartarneri) ^[1] Atuutilernissamut ataani aalajangersakkat taakkartorneqartut imarai:

§ 2

Inatsisartut inatsisaat atuuttuulerpoq 1. januar 2019.

Aka Grønvold (atsior.)
Naalakkersuisoqarfimmi pisortaagallartoq

/Mehdi Shams (atsior.)

[1] Inatsimmut allannguut kapitali 1-mi kapitalip qulequtaanut, § 1, imm. 1, nr. 4, § 3, § 4, § 6, imm. 5, § 9, imm. 2 aamma § 11-mut tunngassuteqarpoq.

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut